


大智度論

第二十六

二百十  
建六

48862



和光堂藏

大智度論卷第二十六

龍樹菩薩造

姚秦三藏法師鳩摩羅什譯

建

釋初品中十八不共法第四十一

十八不共法一者諸佛身無失二者口無失  
三者念無失四者無異想五者無不定心六  
者無不知已捨七者欲無減八者精進無減  
九者念無減十者慧無減十一者解脫無減  
十二者解脫知見無減十三者一切身業隨  
智慧行十四者一切口業隨智慧行十五者  
一切意業隨智慧行十六者智慧知過去世  
無礙十七者智慧知未來世無礙十八者智  
慧知現在世無礙問曰是三十六法皆是佛

法何以故獨以十八爲不共。答曰：前十八中，  
聲聞辟支佛有分於後十八中，無分如舍利  
弗能分別諸法，暢演一句通達，無礙佛讚言  
善通法性。阿泥盧頭、天眼第一如是等諸聲  
聞，皆有分於四無所畏者，如佛說弟子  
中能師子吼第一、賓徒羅、叵羅、埵逝、舍利弗  
亦自誓言：我七日七夜能演暢一義，今無窮  
盡。四分別慧諸阿羅漢、舍利弗、目犍連、富樓  
那、阿難、迦旃延等亦如是。義名字語言樂說  
以是故。前十八不名不共。問曰：何以故佛無  
身失、無口失、答曰：佛於無量阿僧祇劫來持  
戒清淨，故身口業無失。餘諸阿羅漢如舍利

弗等極多六十劫不久習戒故有失佛無量  
阿僧祇劫集諸清淨戒成就故常行甚深禪  
定故得一切微妙智慧故善脩大悲心故無  
有失復次佛拔諸罪根因緣故無有失罪根  
本因緣有四種一者貪欲因緣二者瞋恚因  
緣三者怖畏因緣四者愚癡因緣是罪根因  
緣及習皆已拔阿羅漢辟支佛雖拔罪因緣  
習不盡故或時有失佛於一切法中遍滿智  
慧常成就故若不知故有失如舍利弗與五百  
比丘遊行至一空寺宿是時說戒日不知內  
界外界事白佛佛言住處乃至一宿棄捨則  
無界又異時舍利弗目捷連將五百比丘還

時高聲大聲故佛驅遣今出是爲口失又如  
舍利弗不知等食法佛言食不淨食如是等  
身口有失佛諸煩惱習盡故無如是失復次  
佛一切身口業隨智慧行故身無失口無失  
如是等種種因緣故身無失口無失念無失  
者四念處心長夜善脩故善脩甚深禪定心  
不散亂故善斷欲愛及法愛諸法中心不著  
故得第一心安隱處故若心慄念念念有忘  
失佛心無得失以是故無失復次佛宿命通  
明力三種莊嚴念故念則成就無失念多在  
過去用故復次念根力無邊無盡故念無失  
復次佛一切意業隨智慧行故念無失一念隨

意行故如是等名爲念無失如天問經中說  
何人無過失 何人不失念 何人常一心  
應作者能作 正知一切法 一切障得脫  
諸功德成就 唯有佛一人

無異想者佛於一切衆生無分別無遠近異  
想是貴可爲說是賤不可爲說如日出普照  
萬物佛大悲光明一切憐愍等度恭敬者不  
恭敬者怨親貴賤一切悉等如客除糞人名  
居陀佛化度之得大阿羅漢亦如德護居士  
火坑毒飯欲以害佛即以其日除其三毒滅  
邪見火如是等無有異想復次佛於舍利弗  
彌勒菩薩等順佛法行亦不愛提婆達多富

羅那外道六師邪見等亦不憎是爲佛於無  
量阿僧祇劫脩薰心故是衆生中寶如真金  
不可令異復次佛以佛眼一日一夜各三觀  
一切衆生誰可度者無令失時等觀衆生故  
無有異想復次佛種種因緣讚善法種種因  
緣訶不善法亦於善於惡心無增減但爲度  
衆生故有是分別是爲無有異想復次如一切  
不行經中說佛觀一切衆生如己身所作已  
辦無始無中無終是名無異想復次佛觀一  
切衆生及諸法從本已來至不生不滅常清  
淨如涅槃是名無異想復次不二入法門是  
諸法實相門異相即是二法二法即是邪道



佛是無誑法人不應行誑法常行不二入法  
門誑法即是異相如是等名無異想無不定  
心者定名一心不亂亂心中不能得見實事  
如水波盪不得見面如風中燈不得好照以  
是故說佛無不定心問曰定名從未到地乃  
至滅盡定入此定中不能起身葉口葉佛若  
常定無不定心者云何得遊行諸國具四威  
儀爲大衆種種因緣譬喻說法如是事欲界  
繫心及梵世不入定可有是事答曰無不定  
心者有種種義定名常攝心善法中住佛於  
諸法實相中定不退不失是名無不定心復  
次欲界中有定入是定中可說法以是故阿

毗曇中說欲界繫四聖種四念處四正勤四如意足五根五力無諍三昧願智四無礙智有如是等妙功德佛入欲界中定故名無不定心諸聲聞辟支佛從定起若入無記心若入善或退入垢心佛從定起入欲界定初無散亂心時以是故名無不定心復次如聲明

法化人說法化主不說化主說化人不說佛則不化主化人俱能說法定心亦應異聲聞入定則無說佛在定亦能說法亦能遊行如密迹經心密中說諸佛心常在定中心亦應說法復次散亂心法諸結使疑悔等佛皆無阿羅漢雖無四諦中疑一切法中處處有

疑佛於一切法中常定無疑無不定智慧故復  
次聲聞有諸煩惱習氣故有退法故散亂佛  
於一切智處中智滿故無亂如瓶中水滿則  
無聲無動復次唯佛一人名不誑法三堅固  
人中最上苦樂心不異一相異相生滅相斷  
常相來去相如是等諸法相皆是誑法虛妄  
和合作法故佛安立於諸法實相中故心無  
不定無不定故心不異復次五種不可思議佛  
法中最不可思議是十八不共法是佛甚深  
藏誰能思議者以是故佛無不定心事必當  
介佛雖常入定無覺觀麁心有不可思議智  
慧故亦能說法譬如天樂隨天所好種種聲

應是亦無心亦無識法以諸天福德因緣故  
有是如天樂無心無識而能應物何況佛有  
心而不說法以是故說佛無不定心無不知  
已捨者衆生有三種受苦受樂受不苦不樂  
受苦受生瞋樂受生愛不苦不樂受生愚癡  
是三種受苦受生苦住苦滅樂樂受生樂住  
樂滅苦不苦不樂受不知爲苦不知爲樂餘  
人鈍根故多覺苦受樂受於不苦不樂受中  
不覺不知而有捨心是爲癡使所使佛於不  
苦不樂受中知覺生時覺住時覺滅時以是  
故言佛無不知已捨心問曰此中何等爲捨  
不苦不樂即是捨耶爲七覺中捨四無量心

中捨名爲捨。答曰：不苦不樂，即是捨。二處捨，亦是捨。何以故？餘人於不苦不樂受中，不覺念念中生時、住時、滅時。久遠乃覺佛念。念念中盡皆了知。七覺中捨，若心正等不沒不掉，是時應捨。若沒時、行精進想，若掉時、行攝心想，諸聲聞辟支佛，或時錯攝心掉心，未平等便捨佛於念念心中。麤細深淺無不悉知。知已而捨。問曰：若尔者，佛何以爲難陀？說告諸比丘：難陀於諸受生時覺住時覺滅時覺，諸諸想諸覺亦如是。答曰：覺有二種。一者覺心中苦受生知苦受住知苦受住，苦受滅知苦受滅樂受生知樂受住知樂受住。

樂受滅知樂受滅不苦不樂亦如是但能知  
是揔相不能別相知二者念念中苦樂不苦  
不樂受中悉覺悉知念念中心數法無不知  
而過以是故說佛無不知已捨復次佛或時  
捨衆生入甚深禪定一月二月有人疑佛爲  
度衆生故出世何以故常入定佛言我種種  
因緣知故捨非是無知已捨問曰何等是知  
已捨因緣荅曰於大衆中疲厭故小息復次  
佛世世常愛遠離行若菩薩在母胎母亦樂  
遠離行去城四十里嵐鞞尼林中生得道時  
漚樓頻螺林中獨在樹下成佛初轉法輪時  
亦在仙人住處鹿林中入涅槃時在娑羅林

雙樹下長夜樂行遠離以是故佛入禪定復  
次佛常捨心成就故入禪定復次佛遠離憎  
鬧及雜語處亦自觀諸佛功德藏亦受第一  
清淨樂故入禪定復次佛說法已常教諸比  
丘當坐禪無令後悔口之所說身亦自行故  
入禪定復次猒惡供養故知衆生應得度者  
入禪定作禮人往度復次有衆生定少慧多  
者身示行禪以教化之復次有人常見佛生  
猒想故小遠離令其飢虛故復次佛欲爲諸  
天說法故在閑靜處復次佛爲後世作法故  
坐禪又佛自轉法輪已以事付弟子故入禪  
定復次現二種道攝衆生故一者禪定二者

智慧佛在大衆說法爲現智慧靜處攝心爲  
現禪定復次衆生於六塵中三種行見好色  
生喜樂見惡色生憂苦見不苦不樂色生捨  
心乃至法亦如是佛於六塵中自在於喜樂  
憂苦處能生捨心如聖如意中說如是等種種  
因緣故入禪定非不知已捨欲無減者佛知  
善法恩故常欲集諸善法故欲無減修習諸  
善法心無厭足故欲無減譬如一長老比丘  
目闍自縫僧伽梨針袵脫語諸人言誰樂欲  
福德者爲我袵針介時佛現其前語言我是  
樂欲福德無厭足人持汝針來是比丘斐璽  
見佛光明又識佛音聲白佛言佛無量功德



海昏盡其邊底云何無馱足佛告比丘功德  
果報甚深無有如我知恩分者我雖復盡其  
邊底我本以欲心無馱足故得佛是故今猶  
不息雖更無功德可得我欲心亦不休諸天  
世人驚悟佛於功德尚無馱足何況餘人佛  
爲比丘說法是時肉眼即明慧眼成就問曰  
如佛相斷一切善法中欲今云何言欲無減  
答曰言斷一切善法中欲者是未得欲得  
已欲增佛無如是欲佛一切功德具足無不  
得者亦無增益今言欲者如先說佛雖具得  
一切功德欲心猶不息譬如馬寶雖到至處  
去心不息至死不已人寶佛亦如是又如劫

盡大火燒三千大千世界悉盡火勢故不息  
佛智慧火亦如是燒一切煩惱照諸法已智  
慧相應欲亦不盡復次佛雖一切善法功德  
滿足衆生未盡故欲度不息問曰若佛欲度  
衆生未息何以入涅槃荅曰度衆生有二種  
或有現前得度或有滅後得度如法華經中  
說藥師爲諸子合藥與之而捨是故入涅槃  
復次有衆生鈍根德薄故不能成大事但可  
種福德因緣是故入涅槃問曰佛滅度後亦  
有得阿羅漢者何以言但可種福德因緣荅  
曰雖有得阿羅漢者少不足言如佛一說法  
時十方無量阿僧祇衆生得道佛滅後不介

譬如大國征伐雖少有所得不名爲得以是  
故雖衆生未盡而入涅槃復次摩訶衍首楞  
嚴經中說於莊嚴世界壽七百阿僧祇劫度  
脫衆生以是故說佛欲無減精進無減者如  
欲中說欲義即是精進問曰若介者無有十  
八不共法復次欲精進心數法中各別云何  
言欲即是精進答曰欲爲初行欲增長名精  
進如佛說一切法欲爲根本欲如人渴欲得  
飲精進如因緣方便求飲欲爲心欲得精進  
爲成其事欲屬意業精進屬三業欲爲內精  
進爲外如是等差別復以是精進諸佛所樂  
如釋迦牟尼佛精進力故超越九劫疾得阿

釋多羅三藐三菩提復次如說一時佛告阿  
難汝爲諸比丘說法我背痛小息尔時世尊  
四辟鬱多羅僧敷下以僧伽梨枕頭而卧是  
時阿難說十覺義至精進覺佛驚起坐告阿  
難汝讚精進義阿難言讚如是至三佛言善  
哉善哉善修精進乃至得阿耨多羅三藐三

菩提何況餘道以是義故佛精進無減病時  
猶尚不息何況不病復次佛爲度衆生故捨  
甚深禪定樂種種身種種語言種種方便力  
度脫衆生或時過惡險道或時食惡食或時  
受寒熱或時值諸邪難問惡口罵詈忍受不  
厭佛世尊雖於諸法中自在而行是事不生

懈怠如佛度衆生已於薩羅林中雙樹下卧  
梵志須跋陀語阿難我聞一切智人今夜當  
滅度我欲見佛阿難止之言佛爲衆人廣說  
法疲極佛遙聞之告阿難聽須跋陀入是我  
末後弟子須跋陀得入問佛所疑佛隨意說  
法斷疑得道先佛入無餘涅槃諸比丘白佛  
言世尊甚爲希有乃至末後憐愍外道梵志  
而共語言佛言我非但今世末後度先世未  
得道時亦末後度乃往過去無量阿僧祇劫  
有大林樹多諸禽獸野火來燒三邊俱起唯  
有一邊而隔一水衆獸窮逼逃命無地我亦  
時爲大身多力鹿以前脚跨一岸以後脚距

一岸令衆獸踏脊上而渡皮肉盡壞以慈愍力忍之至死最後一兔來氣力已竭自強努力忍令得過過已脊折墮水而死如是久有非但今也前得度者今諸弟子最後一兔須踐陀是佛出世樂行精進今猶不息是故言精進無減念無減者於三世諸法一切智慧相應故念滿足無減問曰先已說念無失今復說念無減念無失念無減爲一爲異若一今何以重說若異有何差別答曰失念名誤錯減名不及失念名威儀俯仰去來法中失念無減名住禪定神通念過去現世通達無礙問曰何以故念無減獨是佛法答曰聲聞

辟支佛善修四念處故念牢固念雖牢固猶  
亦減少礙不通達如宿命智力中說聲聞辟  
支佛念宿命極多八萬劫於廣有減亦於見  
諦道中不能念念分別佛於念念中皆分別  
三相佛心無有一法過而不念者以是故獨  
佛有念無減復次宿命智力隨念智佛於是  
中有力聲聞辟支佛尚無是念力何況餘人  
復次佛以一切智無礙解脫守護念是故無  
減如是等因緣故佛念無減慧無減者佛得  
一切智慧故慧無減三世智慧無礙故慧無  
減復次十力四無所畏四無礙智成就故慧  
無減復次譬如蘇油豐燒燈炷清淨光明亦

盛佛亦如是三昧王等諸三昧禪定油念無  
減清淨炷是因緣故慧光明無量無減復次  
從初發心無量阿僧祇劫集一切智慧故深  
心爲法故頭目髓腦悉捨內外所有而布施  
入火投山剥皮釘身如是等無苦不受故一  
心爲集智慧故慧無減復次佛智慧以一切  
功德持戒禪定等助成故慧無減復次世世  
求一切經書世俗法佛法麤細善不善悉皆  
學知故慧無減復次從十方無量諸佛所聞  
法讀誦思惟修習問難故慧無減復次爲一  
切衆生故爲增益一切善法故破一切處無  
明故慧無減復次是智慧實知諸法相不生



不滅不淨不垢無作無行不分別是智非智  
知諸法一等清淨如虛空無染無著不以二  
法故得不二入法相不二入法相無量無邊  
以是故慧無減如是等種種因緣慧無減解  
脫無減者解脫有二種有爲解脫無爲解脫  
有爲解脫名無漏智慧相應解脫無爲解脫  
名一切煩惱都盡無餘佛於二解脫無減何  
以故聲聞辟支佛智慧不大利故煩惱不悉  
盡故智慧有減佛智慧第一利故煩惱習永  
盡無餘故解脫無減復次如漏盡力中說佛  
與聲聞解脫有差別佛得漏盡力故解脫無  
減二乘無力故有減解脫知見無減者佛於

諸解脫中智慧無量無邊清淨故名解脫知見無減問曰佛一切法中無減何以故但六事中無減答曰一切自利他利中四事能具足欲求一切善法之根本精進能行念能守護如守門人善者聽入惡者遮慧照一切法門斷一切煩惱用是四法事得成辦是四法果報有二種一者解脫二者解脫知見解脫義如先說解脫知見者用是解脫知見知是二種解脫相有爲無爲解脫知諸解脫相所謂時解脫不時解脫慧解脫俱解脫壞解脫不壞解脫八解脫不可思議解脫無礙解脫等分別諸解脫相牢固是名解脫知見無減

如念佛中佛成就五無學衆解脫知目衆此  
中應廣說問曰解脫知見者但言知何以復  
言見荅曰言知言見事得牢固譬如繩二合  
爲一則牢固復次若但說知則不攝一切慧  
如阿毗曇所說慧有三種有知非見有見非  
知有亦知亦見有知非見者盡智無生智五  
識相應智有見非知者八忍世間正見五邪  
見有亦知亦見者餘殘諸慧若說知則不攝  
見若說見則不攝知是故說知見則具足復  
次如從人誦讀分別籌量是名知自身得證  
是名見譬如耳聞其事猶尚有疑是名知親  
目目覩了了無疑是名見解脫中知見亦如

是差別復次有人言阿羅漢自於解脫中疑  
不能自了是阿羅漢非阿羅漢以是故佛爲  
破如是邪見故說諸聖人於解脫中亦知亦  
見諸阿羅漢雖得解脫知見解脫知見有滅  
不得一切知故上上智慧根不成就故諸法  
念念生滅時不知別相分別故佛上上智慧  
根成就知諸法念念別相生滅故解脫知見  
無滅復次法眼清淨具足成就故如法眼義  
中說知是衆生空解脫門入涅槃是衆生無  
相解脫門入涅槃是衆生無作解脫門入涅  
槃知是衆生觀五衆門十二入十八界如是  
種種法門得解脫佛於解脫知見盡知遍知

是故說佛解脫知見無減一切身業一切口業一切意業隨智慧行者佛一切身口意業先知然後隨知行諸佛身口意業一切行無不利益衆生故名先知然後隨智慧行如經中說諸佛乃至出息入息利益衆生何況身口意業故作而不利諸怨惡衆生聞佛出入息氣香皆得信心清淨愛樂於佛諸天聞佛氣息香亦皆捨五欲發心修善以是故言身口意業隨智慧行聲聞辟支佛無是事心故作善然後身口業善意業或時無記不隨智慧而自生何況餘人如憍梵波提比丘雖阿羅漢自食吐而更食是業不隨智慧又如摩

頭波斯咤比丘阿羅漢跳上椽杵或壁上樹  
上又如畢陵伽婆蹉罵恒神言小婢如是等  
身口業先無智慧亦不隨智慧行佛無是事  
問曰若尔者佛或時身口業亦似不隨智慧  
行何以故入外道衆中說法都無信受者又  
復一時在大衆中說法現胷臆示足捷子又  
復爲人疑不見二相故在大衆中現舌相陰  
藏相又復罵諸弟子汝狂愚人罵提婆達汝  
是狂人死人嗽唾人佛結戒八種鉢不應畜  
聽比丘用二種鉢若瓦若鐵而自用石鉢有  
時外道難問佛默然不答又佛處處說有我  
處處說無我處處說諸法有處處說諸法無

如是等身口業似不隨智慧行身口業不離  
意業意業亦應有不隨智慧行云何言常隨  
智慧行荅曰是事不然於是諸事皆先有智  
慧然後諸業隨智慧行何以故佛入外道衆  
中雖知今世不信不受以種後世大因緣故  
又復為止外道謗言佛自高憍以是故自往  
入其衆中又外道言佛自言有大悲普濟一  
切而但自爲四衆說法我等亦是出家求道  
而不爲說又如此經佛往外道衆中說法不  
言不信受佛遙見外道大會高聲論義欲至  
餘處迴往趣之論議師輩遙見佛來自語其  
衆汝等皆默佛是樂寂靜人見汝等靜默或

能來此中衆即默然佛入其衆說娑婆羅門三  
諦外道衆皆默然佛作是念狂人輩皆爲惡  
魔所覆是法微妙乃至無有一人試作弟子  
者作是念已從座而去是人魔孽得離便自  
念我等得聞妙法云何不以自利即皆往詣  
佛所爲佛弟子得道離苦復次外道弟子難  
其師故不敢到佛所是故佛自入其衆中衆  
得聞法信受堅固不復難師得爲弟子或得  
道跡如是等有種種智慧因緣是故往入外  
道衆復次薩遮祇及捷子銅鑠鑠腹自誓言  
無有人得我難而不流汗破壞者大象乃至  
樹木瓦石聞我難聲亦皆流汗作是誓已來



至佛所與佛論議佛質問之皆不能得答汗  
流淹地舉體如漬佛告尼捷汝先誓言無有  
聞我難者而不流汗汝今汗流淹地汝試觀  
佛見有汗相不佛時脫鬱多羅僧示之言汗  
在何處復次有人言或有頭汗身不汗者佛  
頭雖不汗身必有汗以是故佛脫鬱多羅僧  
示其身因是外道大得信向皆入佛法中是  
智慧因緣身業隨行佛現舌相陰藏相者有  
人疑佛身二相而是人應得道疑故不得以  
是故現二相出舌覆面舌雖大還入口中而  
亦無妨見者疑斷有人見出舌相若生輕慢  
心出舌如小兒相見還入口說法無方便起

恭敬歎未曾有人疑佛陰藏不現。爾時世  
尊化作寶象寶馬，指示之言：「陰藏相不現，正  
如是有人言佛出陰藏相，但示一人，斷其疑  
故。」論議師輩言：「佛大慈悲心，若有人見佛陰  
藏相，能集善根，發阿耨多羅三藐三菩提，及  
能大歡喜信敬心生者，皆令得見，斷其疑心。  
除是皆不得見佛。」以大悲爲度衆生故，從三  
種覆出，暫現如電光。是衆生見已，信佛有大  
悲心，實於戒法不取不著。如是等因緣故，現  
二相，非戲非無着。佛告切語諸比丘：汝狂愚  
人者，苦切語有二種：一者垢心瞋罵，二者憐  
愍衆生欲教化，故離欲人無有垢心瞋罵。何

況佛佛憐愍教化故有苦切語有衆生軟語  
善教不入道檢要須苦切鹿教乃得入法如  
良馬見鞭影便去鈍驢得痛手乃行亦如有  
瘡得軟藥唾呪便差有瘡刀破出其惡肉塗  
以惡藥乃愈者復次苦切語有五種一者但  
綺語二者惡口亦綺語三者惡口亦綺語妄  
語四者惡口亦綺語妄語兩舌五者無煩惱  
心苦切語爲教弟子分別善不善法故拔衆  
生於苦難地故具四種惡語者其罪重三二  
一轉轉輕微佛弟子白衣得初道若二道使  
令奴婢故有惡口非不善道攝律儀有二種  
若綺語若惡口綺語阿那含阿羅漢無煩惱

起惡口但以淨心須惡言教化故惡口綺語  
阿那含阿羅漢尚無煩惱所起惡口何況佛  
復次佛若有苦切語不應疑不應難謂佛惡  
心起苦切語所以者何佛惡心久已滅但以  
深心念衆生如慈父教子雖有苦言爲成就  
子故非是惡心佛爲菩薩時三毒未盡作仙  
人名羸提被惡王截其耳鼻手足而不生惡  
心不出惡言介時未得道尚無惡心何況得  
阿耨多羅三藐三菩提三毒已盡於一切衆  
生大慈悲具足云何疑佛有惡心苦切語復  
次佛若言狂愚人是軟語實語所以者何三  
毒發故名爲狂愚亦以善事利益而不肯受

不解佛心不受佛語是爲狂愚復次佛內常  
行無我智慧外常觀諸法空如是者云何有  
惡口是衆生不解佛心故求佛語短若衆生  
解佛以深心憐愍者假令教入大火即時歡  
喜而入如人熱悶時入清涼池何況但語而  
不受衆生爲惡魔覆故不知佛以深心念之  
是故不受佛語以是故言汝是狂愚人復次  
有人得苦切語便歡喜言親愛我故如是言  
以是故佛言狂愚人佛語提婆達汝狂人死  
人嗽唾人狂人者以提婆達罪重當入阿鼻  
地獄故三種苦語惡人者似人而不能集諸  
善法故亦以提婆達剃頭法服似如聖人內

無慧命故名死人如死人種種莊嚴轉轉爛壞終不可令活提婆達亦如是佛日日種種教化惡心轉劇惡不善法日日轉增乃至作三逆罪如是故名爲死人嗽唾人者提婆達貪利養故作天身小兒在阿闍世王抱中王嗚其口與唾令嗽以是故名嗽唾人問曰提婆達得禪定已離欲云何復嗽他唾荅曰是人惡心亦深其根亦利離欲故能變化嗽唾時便失利根故求時便得以是故名嗽唾人狂義如先說復次以提婆達白佛佛已老矣常樂閑靜可入林中以禪自娛僧可付我佛言舍利弗目捷連等有智慧善軟清淨

人尚不令僧屬何況汝狂人死人嗽唾人如是等因緣故佛於諸法雖無所著而爲教化故現苦切語而不聽比丘用八種鉢者金銀等寶鉢以寶物人貪故難得故貪著故不聽畜此寶物乃至不得手舉名寶亦不得畜若作淨施得用價不貴故木鉢受垢膩不淨故不聽畜三種鉢無如是事問曰瓦鐵鉢皆亦受垢膩與木鉢無異何以聽畜荅曰瓦鐵鉢不熏亦不聽以熏不受垢膩故石有麁細細者不受垢膩故世尊自畜所以不聽比丘畜者以其重故佛乳舖力勝一萬白香象是故不以爲重慈愍諸比丘故不聽問曰侍者羅

陀彌善迦須那刹羅多那伽娑婆羅阿難等  
常侍從世尊執持應器何以不憐愍答曰侍  
者雖執侍佛鉢以佛威德力故又恭敬尊重  
佛故不覺爲重又阿難身力亦大故復次以  
細石鉢難得故麤者受垢膩故不聽用佛鉢  
四天王四山頭自然生故餘人無比自然鉢  
若求作甚難多所如廢是故不聽又欲令佛  
與弟子異故佛用石鉢又如國王人所尊重  
食器亦異有人見佛鉢異倍加尊重供養信  
心清淨問曰若鉢應異衣何以同答曰佛衣  
亦異佛初成道時知迦葉衣應佛所著迦葉  
衣價直十萬兩金次後耆城上佛深摩根羯



皴衣價亦直十萬兩金佛勅阿難持此衣去  
割截作僧伽梨作已佛受著是為異問曰佛  
因是告諸比丘從今日若有比丘一心求涅  
槃背捨世間者若欲者聽著價直十萬兩金  
衣亦聽食百味食衣異而後聽鉢獨不聽荅  
曰我先已說石鉢因緣今當更說佛鉢不從  
人受佛初得道欲食時須噐四天王知佛心  
念持四鉢上佛三世佛法皆應四天王上鉢  
尔時未有衆僧云何言聽後若聽無人與石  
鉢又閻浮提不好石鉢故無人與復次佛說  
比丘常應覆功德若受石鉢人謂從天龍邊  
得若令人作其工既難又恐人言此比丘欲

與佛齊功所以不聽衣者若有人言佛在僧中  
受檀越好衣獨著而不聽比丘是故佛聽著  
比丘亦自無著者以施者難有著者難得故  
若不清淨比丘人所不與清淨比丘少欲知  
足故不著佛斷人疑故聽著衣鉢中無望是  
故不聽問曰如經中說佛金剛身不恃仰食何  
以畜鉢答曰佛法有二道一者聲聞道二者  
佛道聲聞法中佛隨人法有所食噉摩訶衍  
法中方便爲人故現有所噉其實不食問曰  
云何是方便答曰佛欲度人示行人法若不  
尔者人以佛非人我等云何能行其法復次  
有人因布施得度爲是人故佛受其食便作

是念我食得助益佛身心大歡喜以歡喜故  
信受佛語如大國王臣下請食王雖不須爲  
攝彼人故多少爲食令其歡喜如是等因緣  
佛現受食問曰若佛不食所受者在何處荅  
曰佛事不可思議不應致問復次有人得佛  
食而度者有聞聲見色觸身聞香而得度須  
食得度者佛以食與之如密迹金剛經說佛以  
食著口中有天求佛道者持至十方施之問  
曰若尔者念僧中說佛食無有衆生能食者  
此義云何荅曰佛不與者無有能食今佛施  
之是故得食何以知之佛食馬麥時以食與  
阿難有沙門二十億以好羹上佛佛以殘羹

與頻婆娑羅王以是故知佛受已與則得食  
不與則不能消復次爲佛設食佛未食者人  
不能消已食殘者佛與能消以是故雖實不  
食爲度人故現受食畜鉢佛不答十四難者佛  
有四種答一者定答二者分別義答三者反  
問答四者置答此十四難法應置答又復若  
有所利益事則答外道所問不爲涅槃增長  
疑惑故以置答知必有所益者分別爲答必  
無所益置而不答以是因緣故知佛是一切  
智人復次若佛說三種法有爲法無爲法不  
可說法則爲已說一切法竟復次是諸外道  
依止常見依止滅見故問以常滅實相無故

佛不荅如外道所見常相無常相無是事何以故外道取相著是常滅故佛雖說常無常相但為治用故復次若人說無者為有有者為無如是人則是過罪佛不荅則無各如日照天下不能令高者下下者高但以顯現而已佛亦如是於諸法無所作諸法有者說有無者說無如說生因緣老死乃至無明因緣諸行有佛無佛是因緣法相續常在世間諸佛出世為衆生顯示此法復次若荅常滅則為有各如問石女黃門兒脩短黑白何類此問則不應荅十四難亦如是但以常滅為本故問無常滅故佛不荅如是等種種因緣故

佛不答十四難無各佛處處說有我處處說  
無我者若人解佛法義知假名者說言有我  
若人不解佛法義不知假名者說無我復次  
佛為衆生欲墮斷滅見者說言有我受後世  
罪福若人欲墮常見者為說言無我無作者  
受者離是五衆假名更無一法自在者問曰  
若尔者何等為實答曰無我是實如法印中  
說一切作法無常一切法無我寂滅是安隱  
涅槃法印名為諸法實相若人善根未熟智  
慧不利佛不為說是深無我法若為說衆生  
即墮斷滅見中間曰若尔者如迦葉問中佛  
說我是一邊無我是一邊離此二邊名為中

道今云何言無我是實有我為方便說答曰  
說無我有二種一者取無我相著無我二者  
破我不取無我亦不著無我自然捨離如先  
說無我則是邊後說無我是中道復次佛說  
有我無我有二因緣一者用世俗說故有我  
二者用第一實相說故無我如是等說有我  
無我無各佛處處說諸法有處處說諸法無  
問曰不應別說有無有即是有我無即是無  
我何以更說答曰不然佛法有二種空一者  
衆生空二者法空說無我示衆生空說無有  
法示法空說有我示知假名相不著我者說  
有我於五衆中著我相者為破是著我故說

但有五衆無常苦空無我寂滅涅槃是名有  
復次有二種斷見一者無後世受罪福苦樂  
者爲說有我從今世至後世受罪福果報二  
者一切法皆空無著是邪見爲是衆生故說  
有一切法所謂有爲無爲法復次不大利根  
衆生爲說無我利根深智衆生說諸法本末  
空何以故若無我則捨諸法如說  
若了知無我有如是人者 聞有法不喜  
無法亦不憂

說我者一切法所依止處若說無我者一切  
法無所依止復次佛法二種說若了了說則  
言一切諸法空若方便說則言無我是二種



說法皆入般若波羅蜜相中以是故佛經中  
說趣涅槃道皆同一向無有異道復次有我  
有法多為在家者說有父母罪福大小業報  
所以者何在家人多不求涅槃故著於後果  
報為出家人多說無我無法所以者何出家  
人多向涅槃故求涅槃者不受一切法故自  
然滅是涅槃復次有人信等諸根未成就故  
先求有所得然後能捨為是人故佛說諸善  
法捨諸惡法有人信等諸根成就故於諸法  
不求有所得但求遠離生死道為是人故佛  
說諸法空無所有此二皆實如無名指亦長  
亦短觀中指則短觀小指則長長短皆實有

說無說亦如是說有或時是世俗或時是第  
一義說無或時是世俗或時是第一義佛說  
是有我無我皆是實問曰若是二事皆實佛  
何以故多讚歎空而毀訾有答曰空無所有  
是十方諸佛一切賢聖法藏如般若波羅蜜  
囑累品中說般若波羅蜜是二世十方諸佛  
法藏般若波羅蜜即是無所有空佛或說有  
法爲教化衆生故人後皆當入無所有法藏  
中問曰若尔者云何般若波羅蜜言若觀五  
衆空無所有非是道答曰是般若波羅蜜中  
說有無皆無如長爪梵志經中說三種邪見  
一者一切有二者一切無三者半有半無佛

告長爪梵志是一切有見爲欲染爲瞋恚愚  
癡所縛一切無見爲不染不瞋不癡不著不  
縛半有半無有者同上有縛無者同上無縛  
於三種見中聖弟子作是念若我受一切有  
見則與二人共諍所謂一切無者半有半無  
者若我受一切無見亦與二人共諍所謂一  
切有者半有半無者諍若我受半有半無者  
亦與二人共諍所謂一切無者一切有者闔  
諍故相諍相諍故致惱見是諍諍惱故捨是  
無見餘見亦不受不受故即入道若不著一  
切諸法空心不起諍但餘結使是名爲實智  
若取諸法空相起諍不滅諸結使依止是智

慧是爲非實智如佛所諍爲度衆生故有所  
說無不是實但衆生於中有著不著故有實  
不實如是種種因緣故佛身口意業無有過  
失是故說佛身口意先知然後隨智慧行問  
曰初說身無失口無失念無失今復說身口  
意業隨智慧行義有何差別答曰先三種無  
失不說因緣今說因緣隨智慧行故不失若  
先不籌量而起身口意業則有失佛先以智  
慧起身口意業故無失復次佛成就三種淨  
業三種寂靜業三不護業有人疑言佛何因  
緣成就如是業以是故佛言我一切身口意  
業先以智慧然後隨智慧行佛以智慧知過

去未來現在世通達無礙者此三種智慧於  
三世通達無礙故三業隨智慧行問曰過去  
諸法已滅已盡無所復有未來世諸法今不  
來不生未和合現在乃至一念中無住時云  
何能知三世通達無礙答曰佛說過去未來  
現在通達無礙此言豈虛復次若無過去未  
來但有現在一念頃佛亦不得成就無量功  
德如十種智是十力是時亦不得一心有十  
智若余者佛亦不得具足十力以是因緣故  
知有過去未來問曰若過去未來現在皆有  
者何等是無佛說四諦苦諦觀無常等相無  
常名生滅敗壞不可得若過去法今實有不

名爲無常敗壞不可得復次若過去未來現在皆有者便墮常何以故是法在未來世中定有轉來現在從現在轉入過去如人從一房入一房不名失人荅曰若不失有何咎問曰若無無常無罪無福無生無死無縛無解罪名殺等十不善道若無無常無殺等罪如分別邪見中說刀在身七分中過無所惱害福名不殺等十善道無常名分別生死若無無常亦無邪見亦無縛亦無解如是等無量過咎荅曰諸法三世各各有相過去法有過去相未來法有未來相現在法有現在相若過去未來有現在相者應有是難而今過去

未來現在各自有相復次若實無過去未來亦無出家律儀所以者何若現在惡心中住過去復無戒是爲非比丘又賢聖人心在世俗中是時應當是凡夫無過去未來現在道故如是亦無五逆等諸罪所以者何是五逆罪業已過去及死時入地獄是五逆罪未來無業故無報現在身不爲逆罪若無過去則無逆罪若無逆罪何有餘罪福亦如是若無罪福是爲邪見與禽獸無異復次我不說過去未來如現在相有我說過去雖滅可生憶想能生心心數法如昨日火滅今日可生想憶念不可以憶想念故火便有若見積薪知當燃

火亦生心想念明日火如過去火不可以今  
心念火火便有未來世事亦如是現在心雖  
心念時不住相續生故能知諸法內以現在  
意爲因外以諸法爲緣是因緣中生意識用  
意識自在知過去未來現在法但不自知現  
在心心數法餘者悉知問曰般若波羅蜜如  
相品中三世一相所謂無相云何言佛智慧  
知三世通達無礙答曰諸佛有二種說法先  
分別諸法後說畢竟空若說三世諸法通達  
無礙是分別說若說三世一相無相是說畢  
竟空復次非一切智人於三世中智慧有礙  
乃至觀世音文殊師利弥勒舍利弗等諸賢



聖於三世中智慧皆有礙以是因緣故說佛  
智慧於三世中通達無礙不爲空事故說復  
次有人於三世中生邪見謂過去法及衆生  
有初無初若有初則有新衆生諸法亦無因  
無緣而生若無初亦無後若無初無後中亦  
無初名有中有後無前後名有初有中後中  
名有初有後若衆生及諸法無初亦無中無  
後若無三世則都無所有復次若無初云何  
有一切智人破如是等邪見故說三世諸法  
一相所謂無相不爲破三世佛智慧問曰無  
相是爲有邊答曰若無相即是無邊不可說  
不可難法云何言有邊若無相中取相非是

無相是無相名爲不可得空是中無相亦不可得空亦不可得是故名不可得空復次佛有二種道一者福德道有人聞佛十力四無所畏四無礙智十八不共法等生恭敬信樂心二者智慧道有人聞說諸法因緣和合生故無有自性便捨離諸法於空中心不著如月能潤物日能熟物二事因緣故万物成就福德道智慧道亦如是福德道能生諸功德智慧道能於福德道中離諸邪見著以是故佛雖說諸法畢竟空亦說三世通達無礙而無各如是等略說佛十八不共法義問曰若尔者迦旃延居士何以言十力四無所畏大

悲三不共意止名爲十八不共法若前說十  
八不共法是真義者迦旃延居士何以故如  
是說答曰以是故名迦旃延居士若釋子則  
不作是說釋子說者是真不共法佛法無量  
是三十六法於佛法中如大海一滂法亦不  
少何以重數爲十八復次諸阿羅漢辟支佛  
菩薩亦能知是處不是處分別三世業果報  
及諸禪定乃至漏盡智等云何言不共法問  
曰聲聞辟支佛菩薩不能盡知遍知但有通  
明無有力獨佛能盡遍知故言不共如十力  
中說答曰佛說十力義不言盡知遍知直言  
知是處不是處言盡知遍知者是諸論議師

說問曰汝先自言摩訶衍經中說佛爲菩薩  
故自說盡知遍知荅曰摩訶衍經中說何益  
於汝汝不信摩訶衍不應以爲證汝自當說  
聲聞法爲證復次十力佛雖盡知遍知而聲  
聞辟支佛有少分十八不共法中始終都無  
分以是故名真不共法問曰十力不共法二  
乘亦應有分但佛身口念常無失二乘身口  
念亦有無失如是等皆應有分荅曰不然所  
以者何常無失故名爲不共不以不失爲不  
共聲聞辟支佛於常無失中無分復次諸阿  
羅漢說有力無有是處說有不共法汝不信摩  
訶衍故不受真十八不共法而更重數十力

等是事不可如汝所信八十種好而三藏中  
無何以不更說問曰我等分別十八不共法  
不重數也何等十八一者知諸法實相故名  
一切智二者佛諸功德相難解故功德無量  
三者深心愛念衆生故名大悲四者得無比  
智故智慧中自在五者善解心相故定中自  
在六者得度衆生方便故變化自在七者善  
知諸法因緣故記別無量八者說諸法實相  
故記別不虛九者分別籌量說故言無失十  
者得十力成就智慧無減十一者一切有爲  
法中但觀法聚無我故常放捨行十二者善  
知時不時安立於三乘常觀衆生故十三者

常一心故不失念十四者無量阿僧祇劫深  
善心故無煩惱習十五者得真淨智故無有  
能如法出其失十六者世世敬重所尊故無  
能見頂十七者修大慈悲心故安詳下足足  
下柔軟衆生遇者即時得樂十八者得神通  
波羅蜜故轉衆生心令歡喜得度故如入城  
時現神變力荅曰如是十八不共法非三藏  
中說亦諸餘經所不說以有人求索是法故  
諸聲聞論議師輩處處撰集讚佛功德如言  
無失慧無減念不失皆於摩訶衍十八不共  
法中取已作論議雖有無見頂足足下柔軟如  
是甚多不應在十八不共法中不共法皆以

智慧為義佛身力如十萬白香象力及神通  
力等皆不說以是故當知十八不共法中但  
說智慧功德等不說自然果報法復次是十  
八不共法阿毗曇分別五眾攝身口無失身  
口隨智慧行是色眾攝無異想是想眾攝無  
不定心是識眾攝餘者行眾攝皆在四禪中  
佛四禪中得道得涅槃故有人言四色不共  
法色界欲界中攝餘九地中攝皆是善皆是  
無漏法四色法二緣生因緣增上緣餘殘四  
緣生四無緣十四有緣四隨心行不與心相  
應十三與心相應亦隨心行一不與心相應  
亦不隨心行如是等種種阿毗曇分別說初





